


# GRAUN NA GUTPELA SINDAUN LONG PAPUA NUIGINI



Tim Anderson | Raitim long Tok Inglis  
Rosa Koian | Raitim go long Tok Pisin



*September 2017*

**Tim Anderson** | Raitom long Tok Inglis

**Rosa Koian in tanim** | go long Tok Pisin

**Supported by Aid/Watch Inc.** | [aidwatch.org.au](http://aidwatch.org.au)

**Funded by The Christenson Fund** | [christensenfund.org](http://christensenfund.org)

**Design** | Natalie Lowrey | [natalie.lowrey@gmail.com](mailto:natalie.lowrey@gmail.com)

# TOK I GO PAS

Dispela em I sampela sotpela tingting I stap long buk 'Land and Livelihoods in Papua New Guinea'. Tim Anderson I raitim dispela buk long Tok Inglis. Tim Anderson em I wok olsem tisa bilong ol sumatin long Univesiti bilong Sidni long Austrelia.

Bihainim sampela singaut I kam long ol poromanmeri bilong em long Papua Niugini Tim Anderson I bin kam raun long planti ples long 4-pela provins long Papua Niugini na stori wantaim na harim stori bilong ol lain long ol ples em I raun long en. Dispela ol 4-pela provins em Madang, Morobe, Isten Hailans na Is Niu Briten.

I gat planti famili long Papua Niugini I stap long planti presa bilong salim o givim graun bilong ol I go long ol bikpela welpam kampani. Astingting bilong dispela buk em bilong skelim wanem ol arapela rot ol asples, papa na mama graun I wok long yusim long kisim sampela moni na gutpela sindaun I kam long famili bilong ol.

I gat luksave olsem long planti hap long wold ol promis bilong gutpela sindaun I no save kamap bihain long ol pipol I salim o givim graun aninit long lis. Planti pipol husat I lusim graun bilong ol I go long ol arapela lain I save kamap turangu moa yet. Olsem na astingting bilong dispela buk em bilong halivim ol papa na mama graun long luksave long wanem as ol I mas noken salim graun.

Dispela buk I painimaut olsem namba wan rot ol papa na mama graun long Papua Niugini I mas bihainim em long stap bos bilong graun bilong ol yet na long yusim dispela graun long wei bilong ol yet na kamapim wanpela namel rot we Tim Anderson I kolim 'haibrid sindaun'.

# 1. GRAUN NA GUTPELA SINDAUN LONG PAPUA NIUGINI

Planti ris man na meri, ol bikpela kampani na sampela gavman tu nau I wok long putim ai long graun bilong Papua Niugini. Dispela ol I laik mekim planti moa moni moa antap long graun hariap tasol. Ol I no save wari long ol liklik manmeri.

Graun em I wanpela namba wan samting tru I mekim na ekonomik sistem I save ron. Graun em I save givim kaikai, strong, na I save inapim sindaun bilong ol arapela pipol taim I gat hevi. Nau yet bikos I gat bikpela hangre long sampela ples long wold na sot bilong pawa na planti bagarap I kamap long bus, graun na wara long ol arapela hap long wold, ol moni lain I lukluk long wanem ol arapela ples ol inap kisim nupela graun.


Dispela I kisim kam wanpela bikpela wari. Wari em olsem gutpela sindaun we graun I save givim ol pipol bilong Papua Niugini I stap long mak bilong kisim bagarap sapos ol pipol I givim graun bilong ol I go nating. Insait long Papua Niugini liklik lain tasol olsem 15 pesen bilong populesen bilong yumi I stap long taun. Na bikpela hap lain em 85 pesen I stap long ol ples na gutpela sindaun bilong ol I save hangamap long graun bilong ol.

I gat luksave olsem Papua Niugini em I wanpela kantri husat I no bin rausim graun long han bilong ol pipol bilong em. Dispela I mekim na long planti yia I kam nau, ol pipol I no save kisim bikpela

hangre bikos ol gaden bilong ol I save pulap tru long kainkain kaikai. Dispela ol gaden tu I sapatim lokol maket tasol gavman i nogat planti luksave long en.

Wanpela gutpela samting em Papua Niugini I gat em I sistem bilong lukautim na bosim graun bilong em. Dispela sistem em planti yumi save pinis graun em I stap long han bilong olgeta pipol insait long wan wan klen. Graun I no stap long han bilong wanpela man o meri tasol. Nogat. Skelim gut long stori bilong graun I gat luksave olsem Papua Niugini I gat gutpela pasin tru long skelim gut graun na olgeta lain inap yusim long lukautim ol yet na kamapim gutpela sindaun.

Tasol I gat wanpela bikpela asua. Skelim! Olsem wanem na maski ol pipol bilong Papua Niugini I holim planti hap graun ol I no save inap long kisim gutpela sevis long hausik, long skul, na ol rot bilong ol I save bagarap tru olgeta taim. Planti ol rurol ples long Papua Niugini I no stap arere long rot. Ol pipol insait long dispela ol ples I mas karim kago na wokabout long longpela rot I go I kam long kisim sevis bilong gavman. Papua Niugini I no sot long ol risos olsem ges, kopa na gol na dispela I min olsem kantri I mas I gat planti moni tru. Tasol nogat. Ol sevis bilong lukautim ol pipol olsem hausik, skul na rot I save sot tru. Olsem na wanpela bikpela askim em olsem olgeta moni I save go we?



I gat planti toktok olsem bikos ol famili na klen I pasim graun bilong ol developmen wok I no save kamap long ol ples bilong ol. Olsem na planti lain wantaim moni I save wok hat tru na raun na grisim ol famili na klen long lusim graun bilong ol I go na developmen bai I kam long ol.

Toktok bilong kisim graun em I no isipela samting, na ol pipol I bin soim long yia 1990 na bihain long yia 2000 olsem ol I no wanbel long pasin gavman I wok long bihainim long kisim graun bilong ol. Ating ol pipol I save moa long gutpela bilong graun, long pasin bilong graun olsem na ol I no laik givim graun bilong ol nating I go.

## 2. KASTOM GRAUN NA NUPELA TINGTING BILONG YUSIM GRAUN



Planti pipol bilong arapela kantri I no inap klia gut long pasin bilong sindaun na poro gut wantaim graun. Em I samting we ol pipol bilong Papua Niugini I save gut tru. Dispela ol lain I no laik long luksave olsem graun I bin lukautim ol pipol long planti tausen yia I go pinis na ol pipol I gat rispek long em. Ol I no laik luksave tu olsem ol pipol I no wokabaut

nating antap long ol graun bilong ol, ol I stap wan tru wantaim graun.

Sampela savemanmeri I laikim pasin bilong wanwan man o meri I holim graun. Ol I tok long dispela rot tasol developmen I ken kamap long ol ples. Bihainim dispela kain tingting ol I kam long kantri bilong yumi na subim planti traipela moni long pes bilong ol pipol. Ol I tromoi

kain ol tok olsem, 'Registerim Graun', 'Lusim Graun I Go Fri' na putim sampela moni tu wantaim long strongim dispela ol tok.

Buk bilong Dr Tim Anderson I luksave tru long traipela save pasin kastom bilong pipol bilong Papua Niugini I gat. Insait long dispela ol pasin kastom ol gutpela rot bilong yusim graun long inapim sindaun bilong ol pipol I stap. Nau long dispela taim planti sistem bilong groim kaikai long fidim planti milien pipol long wold I wok long pundaun. Tasol pasin bilong ol pipol bilong Papua Niugini long groim kaikai long ol liklik gaden bilong ol I sanap strong yet. Em I luk olsem dispela ol liklik gaden inap fidim planti pipol I stap wantaim hangre.

Kastom graun em I no samting nating. Long planti hap bilong Papua Niugini I gat kainkain rot ol pipol I skelim graun I go I kam tasol olgeta taim ol I save tingim olsem olgeta famili I mas benefit long dispela ol hap graun na I mas nogat hangre long insait long ol famili. Sapos ol pipol I laik mekim senis long yusim graun orait dispela ol senis I save kamap bihainim ol lo bilong ples.

Tasol nau dispela taim sampela dispela ol lo I mas senis wantaim olgeta senis I wok long kamap. Dispela ol senis I mas kamap bihainim gutpela pasin wantaim tingting bilong lukautim sindaun bilong olgeta.

Long sampela yia I go pinis ol pipol bilong Papua Niugini I bin luksave long pasin gavman I mekim long kisim graun bilong ol. Em inap mekim olsem bikos em i save kisim moni sapot long ol bikpela aid grup bilong ol arapela kantri.

Stat long ol yia namel long 1970 na I kam antap ol dispela bikpela aid grup I tromoi planti moni tru long pulim graun long ol pipol long Papua Niugini na ol arapela kantri

tu long Afrika na Saut Amerika. Tasol I bin I gat planti kikkbek bikos ol pipol I luksave long wanem samting I wok long kamap na ol I tingim sindaun bilong ol bai I stap olsem wanem sapos ol I lusim graun bilong ol olgeta.

Bihainim planti kikkbek dispela ol aid grup olsem Wol Benk I bin go bek tasol nupela tok I kam bek long Papua Niugini na Melanesia olgeta. Nupela tok ya em, 'Mekim Graun I Wok' we gavman bilong Austrelia I go pas na sapotim. Hariap tru dispela toktok I kamap ples klia na ol pipol long Papua Niugini na Vanuatu I askim, 'olsem wanem graun I no save mekim wok?' Ol pipol I save graun em I save wok olgeta taim olsem na maski ol I yet I no mekim gaden I gat kaikai olgeta taim bilong ol I stap long graun, long bus, wara na solwara.



### **3. EKONOMIKS BILONG GRAUN: OLPELA NA NUPELA**

Planti yumi long Papua Niugini I hangamap long tingting olsem ekonomiks em I min moni. Ekonomiks em I pasin; bilong kamapim ol samting, bilong yusim ol samting na bilong skelim dispela ol samting I go I kam. Moni em I wanpela tul insait long sistem bilong moni we ol pipol I save yusim long senisim ol samting I go I kam.

Gros Domestik Prodak (GDP) em I wanpela pasin bilong skelim hamas moni wanpela kantri I save mekim insait long 6-pela mun o wanpela yia bihain long em I kamapim na salim ol samting olsem gol, kopa, kopi, welpam na ol arapela samting long ol bikpela intanesenel maket. Yumi ken luksave olsem skel bilong GDP I no gat luksave long ol kaikai bilong gaden we ol fama bilong yumi long Papua Niugini I save groim na salim long ol domestik na lokal maket bilong yumi.

Nau long Papua Niugini yumi lukim I gat planti wok I kamap long maining, ges na wel na ol welpam, kopi, kopra na kakao. Dispela olgeta samting em bilong salim I go long ol maket long ovasis. Seim taim ol famili long ol ples I save mekim planti wok long graun bilong ol tasol I nogat luksave long dispela ol wok.

Insait long pasin bilong ekonomiks nau I gat nupela tingting. Long Papua Niugini yumi lukim I gat bam long olupela na nupela tingting bilong ekonomiks.

Olpela tingting I sut long ekonomi bilong kantri I mas grow. Em I sanap long

tingting olsem wanwan lain tasol I ken mekim wok bilong kamapim ol samting bilong salim long maket na olgeta arapela I bilong yusim tasol ol samting olsem na ol I no save skelim ol moni na kago I go I kam gut. Nogat. Ol I tingim ol yet. Ol I no wari long ol bikpela bagarap ol I mekim long bus, graun, wara na ol pipol. Ol I no wari long baim takis na wanem kain ol moni ol inap long mekim. Ol I bisi tasol long wok bilong mekim moni.

Nupela tingting bilong ekonomiks em I sut long gutpela sindaun bilong ol pipol, pasin bilong kamapim ol samting em I kainkain na narakain narakain, we dispela ol wok em I liklik na ol family yet I ken mekim, na em I sanap strong long lukautim ol sistem we I stap pinis na I wok long halivim ol pipol. Dispela nupela tingting tu I sanap strong long lukautim ol bus, graun na wara na em I laik lukim olsem ol gutpela senis I kamap long laip bilong ol pipol. Kain ol gutpela senis I ken kamap long sait bilong skul, o helt o ol arapela.

#### **SAMPELA PAUL TINGTING LONG KASTOM GRAUN**

Pipol bilong Papua Niugini I save yusim planti taim bilong ol long wok long graun na bus na wara bilong ol. Sampela I wok gaden, sampela I painim abus na kumu long bus na wara na ol arapela I kisim



diwai na rop na wokim haus na sampela I raun na was tasol long graun bilong ol.

Sampela save man na meri I tok ol pipol blong Papua Niugini I mas senisim dispela pasin na surik I go long ekonomi em I sanap antap long moni. Dispela em I no stretpela tingting. Ol pipol bilong Papua Niugini I stap pinis long tupela sistem wantaim - em olsem - ol I wok long graun bilong lukautim sindaun bilong ol yet na seim taim ol I groim ol samting we ol I save salim na kisim moni.

Ol dispela saveman na meri tu I tok ol papa na mama graun long Papua Niugini I mas givim graun bilong ol I go long ol investa bilong halivim long kamapim developmen. Planti ol dispela lain I tok graun em I silip nating na I no mekim wanpela wok. Nogat tru. Graun em I bikpela samting long laip bilong ol pipol na em I ken bringim moni I kam long ol famili. Em I tok strong long graun I mas stap long han bilong ol pipol.

Ol dispela save man na meri I tok tu olsem ol bikpela plantesin bilong welpam I save givim planti kaikai na ol liklik gaden bilong ol famili nogat. Dispela em I wanpela hap tingting tasol. Em I no soim tru piksa bilong wok bilong graun we ol pipol I save mekim.

Long wanem kainkain ol rot I stap insait long ekonomiks bilong fomol sistem ol dispela save man na meri I tok em I gutpela moa long infomol sistem. I no olgeta taim fomol sistem I save orait. Skelim dispela: Long yia 2010 Benk Saut Pasifik I tok, "Agrikalsa, em kakao na kopi na kopra, I bin mekim na sindaun bilong ol biklain long ples long Papua Niugini I bin stap gut stret. Tasol ol I

krangki liklik. Ol I tok bikpela samting em I pusim fomol agrikalsa em ol samting we kantri I save salim long ol maket ovasis. Ol samting olsem kakao, kopi na kopra. Wok agrikalsa long Papua Niugini em I groim planti kumu na fres kaikai na I save bringim moa moni I kam long ol family. Tru kakao, kopi na kopra I gat biknem tasol ol I no bringim planti moni long ol famili.

Graun em I wanpela bikpela samting tru ol pipol bilong Papua Niugini I gat na nogat narapela I ken kisim nating. Planti pait I save kamap, na man meri na pikinini I save dai sapos narapela lain I paulim graun blong narapela. Planti taim ol lain husat I pulap long kago, na husat I no save long velu bilong graun I save lukim graun olsem samting nating, em I sampela kain doti samting, em I save les na silip nating. Na nau long dispela taim planti yumi husat I hangre long moni I save hangamap long tingting bilong salim graun.

## EKSPOTIM OL KESKROP O SALIM LONG LOKOL MAKET

I gat luksave nau olsem pasin bilong salim keskrop I go long ol maket ovasis em I bikpela samting. Em I mekim ol ekspota I luk na fil gut tasol dispela stadi we Tim Anderson I mekim I luksave olsem ekspot I no save bringim planti moni long ol famili long ol ples. I tru I gat planti gavman sapot I go long salim ol keskrop long ovasis maket.

Sapos yumi lukluk gut ol famili long ol ples I save mekim planti moni long ol liklik lokol maket. I gat sampela komyuniti

ol I traim narapela rot bilong kisim moni na ol I luksave long strong bilong dispela ol wok bilong ol na ol I lukautim gut dispela ol wok, tasol planti ol komyuniti I no save I gat kain ol tingting I stap insait long Papua Niugini.

## SAMPELA NUPELA TINGTING BLONG BOSIM GRAUN LONG PAPUA NIUGINI

Planti grup na sampela savemanmeri I kamapim planti tingting olsem graun I mas lusim han bilong ol pipol bilong Papua Niugini bikos graun I no mekim wanpela wok. Ol dispela toktok I kam long planti kainkain nek na sampela kain rot we ol pipol long ples bai I no inap luksave hariap.

Senta bilong Independen Stadi long Austrelia em I wanpela grup we ol benk long Austrelia, ol maining kampani na ol konsalten I ronim. Dispela senta I tok olgeta kastom graun I mas lusim han bilong ol klen na I go stap long han bilong wanwan man o meri.

Narapela grup em I kolim em yet olsem ITS Global. Dispela em I wanpela ovasis kampani we ol loging kampani I putim ol wokman na mausman bilong ol insait. ITS Global I tok, 'pasin bilong salim planti diwai na welpam long holsel I save bringim planti moni olsem na planti sans bilong ol pipol long mekim sampela moni. Astingting bilong dispela kain tingting em I olsem: kampani husat I laik mekim wok bilong katim diwai na growim welpam bai I nidim planti moa graun.

Ol konsalten bilong Austrelia na Papua Niugini yet I tok, moni mak long bilien

dola bai I go long GDP bilong Papua Niugini sapos Papua Niugini I bihainim rot bilong registerim graun o putim graun bilong ol long lis. Ol I tok: ol lain I mekim wok kamap insait long Papua Niugini em ol dispela lain husat inap tilim wok bilong ol I go tupela - wanpela em ol wok prosek ol I mekim kamap long graun na narapela em ol I luksave long nid bilong klen.

Planti ol dispela lain I gat tupela tupela tingting. Ol I save mekim wanpela tok tasol seim taim ol yet tu I gat interes long wanpela o sampela hap graun. Em olsem taim ol I kam long ples long kisim graun na mekim wok, ol I no save pulap long hamas graun ol pipol I tok orait pinis long en. Nogat! Ol bai I go het na grisim ol pipol yet long kisim moa graun.

Long Papua Niugini yumi save graun em I no samting bilong wanpela man o meri tasol. Graun em I samting bilong klen olgeta. Klen I bin pait long winim graun na klen I bin sanap long banisim graun. Tasol sampela lain I nogat interest long dispela ol stori bilong graun. Ol I aigris tasol na I laik kisim graun long ol pipol na I nogat tingting long lukautim ol pipol.

Dispela tingting na pasin bilong lisim graun long Papua Niugini em I stap pinis. Tasol hamas pipol I klia tru long lis em I wanem samting? Lis long Papua Niugini em I min olsem wanpela klen I ken wanbel wantaim wanpela divelopa o investa na ol I larim hap graun bilong ol I go inap sampela yia long ol divelopa ya I ken mekim wok ol I laik mekim antap long graun ya. Bihainim dispela wanbel divelopa bai I peim sampela moni I go long klen ya inap long hamas yia ol I

mekim wok. Sampela pipol long Papua Niugini I save graun bilong ol I bin stap aninit long 99-yia lis na taim lis ya I pinis graun ya I mas go bek long ol.

Nau long dispela taim insait long Papua Niugini yumi lukim ol pipol tu I kamap smat nau. Ol tu I kamapim planti kainkain rot we ol famili long ol ples I wok long bihainim long pasin mekim moni antap long graun bilong ol na lukautim ol yet. Dispela ol kainkain rot I wok long kamap na wok I go I go na wanpela haibrid sistem I stap nau. Lukluk I go longwe dispela haibrid sistem I gat planti gutpela samting we inap long mekim em I wok. Skelim dispela wantaim fomol sistem bilong wok na yumi inap lukim olsem dispela haibrid sistem em I gat planti sans.

Long sampela hap Dr Anderson I raun em I lukim ol famili I groim ol kaikai long

gaden bilong ol yet, ol I salim sampela dispela kaikai long maket, ol I groim tu sampela kakao na kopi bilong salim long lokol baia o ovasis, ol I ronim ol liklik famili bisnis olsem pmv kar, tret stoa, kakaruk na planti arapela liklik bisnis. Sampela dispela ol famili tu I gat sampela famili memba I wok long opis bilong gavman o wantaim kampani. Dispela rot tu I bringim sampela moni I go insait long famili.

I gat luksave olsem ol famili long ol ples I mekim moa long wanpela liklik wok bisnis long mekim moni.

Strong bilong dispela haibrid sistem em I stap long graun bilong ol. Sapos dispela ol famili I bungim olgeta moni ol I mekim long dispela olgeta ol rot em bai I klia tru ol famili long ples I save mekim moa moni antap long graun blong ol yet.

Yumi skelim:

<b>MONI I KAM OLSEM WANEM</b>	
<b>Moni I kam long fomol sekta</b>	<b>AWE (Kina)</b>
Ramu Sugar basic wage, 2006 (Madang Pr.)	42
RD Tuna factory wage, 2006 (Madang Pr., women)	34
Ramu Nickel construction wage, 2006 (Madang Pr., men)	50
Chicken factory workers, 2011 (Morobe Pr.)	102
Private store workers, 2011 (ENB)	45-100
VOP/LSS Oil Palm growers, 2006 (Oro Pr.)	61
Mama Lus Frut Income, 2000 / 2011	28/49
National Minimum Wage, 2006 / 2011	37.20 / 91.60
<b>Moni I kam long Infomol Sekta</b>	
Various informal sector incomes, 2003 (av. Four provinces)	124-158
Roadside fresh produce sellers, 2006-2011 (weighted av. 4 provinces, women)	144-230
<i>Ol stori ya I kam long, Sowe na ol arapela 2003, Anderson, 2011, Anderson 2013. Blong Tingim: Insait long Infomel Sekta em pasin bilong salim ol frut, kumu, kuk kaikai, ol kaikai I stap insait long paket, ol liklik stua, ol PMV trak na ol arapela liklik bisnis.</i>	

# 4. GAVMAN POLISI I KEN BIHAINIM SAMPELA DISPELA ROT

Sampela rot we gavman inap tingting long em, em long luksave long wanem ol haibrid sistem I wok insait long kantri na serim dispela ol tingting wantaim ol komyuniti long ol ples. Gavman Inapt u long sapotim ol lokol maket na ol gutpela sindaun na putim moni I long ol skul, hausik na gutpela rot.

Bikpela samting, tupela sistem I wok sait sait wantaim – em fomol na infomol sistem.

Ol piksa daunbilo I soim haibrid sistem we I wok insait long ol rurol ples. Bikpela samting long dispela sistem em hamas moni ol famili I mekim. Dispela piksa em

I kam long wanpela wok painimaut we I lukluk lo hamas moni wan wan famili I save mekim.

Dispela piksa I soim olsem gutpela haibrid na namba wan haibrid pasin bilong wok maket I save bringim planti moni I go long ol famili. Yes, sampela I ting olsem ol I ken rentim hap graun na bai ol I kisim sampela moni tasol lukluk gut insait long wanpela yia ol I mekim liklik moni tasol inap K8,500. Besik rurol em I pasin we planti nau yet I wok long bihainim long kisim sampela moni. Em I orait, tasol sapos ol inap surik I go long gutpela haibrid ol bai I lukim moa moni long wan wan yia.

1. NOGAT GRAUN	
Rentim graun na kisim royalty antap long 10 hekta graun	K1,000 long wan wan yia
Holim tupela wok na kisim K50 na K100 long potnait	K7,500 long wan wan yia
<b>TOTAL</b>	<b>K8,500 long wan wan yia</b>
2. BESIK RUROL	
Liklik gaden long ples	K13,000
Salim gaden kaikai na ol arapela samting long ol liklik lokol maket	K2,000
<b>TOTAL</b>	<b>K15,000</b>
3. GUTPLA HAIBRID	
Liklik gaden long ples	K13,000
Salim gaden kaikai na ol arapela samting long lokol maket	K6,500
Ekspotim ol keskrop long ovasis maket	K2,500
Ronim liklik bisnis olsem kakaruk na tret stoa	K2,500
<b>TOTAL</b>	<b>K24,500</b>
4. NAMBA WAN HAIBRID	
Liklik gaden long ples	K13,000
Salim ol gaden kaikai na ol arapela samting long gutpela lokol maket	K10,000
Ekspotim ol keskrop long ovasis maket	K5,000
Ronim liklik bisnis olsem kakaruk na tret stoa	K2,500
Holim wanpela wok long taun	K5,000
<b>TOTAL</b>	<b>K35,500</b>

## 5. MAKET LONG SAIT BILONG ROT

Bikpela iekonomik sistem I no laik long luksave long ol liklik maket insait long kantri. Ol liklik maket long sait bilong ol rot I save bringim sampela gutpela moni I go long ol famili.

Planti hap bilong Papua Niugini ol pipol I save groim kaikai bilong ol yet. Sampela dispela ol kaikai ol I save salim long maket na ol I save groim sampela keskrop bilong salim ovasis tu. Sampela memba bilong ol famili tu I save wok long opis. Lukluk gut insait long ol ples sampela famili I mekim planti samting long kisim moni. Ol I no pas long wanpela samting tasol. Nogat.

I gat tingting olsem ol bikpela maket I save kamapim planti sans bilong wok. Narapela tingting em olsem bikpela wok I mas go insait long groim moa keskrop. Long dispela rot tasol moa sans bilong wok na gutpela sindaun bai I kamap. Namba tri tingting em olsem ol liklik maket I nogat sans long bringim moa moni, na I no save yusim planti save na masin na moni. I gat tok olsem dispela ol maket I no save gat han long graun na moni olsem na ol I nogat sans long givim gutpela sindaun long ol pipol.

Ol pipol I mas skelim gut kain ol tingting olsem. I no olgeta liklik wok I save pinis hariap tasol. Em I tok ol liklik maket I gat bikpela wok long ol rurol pipol. Dispela ol liklik maket I save bringim moni hariap tasol, na I no save nidim ol namelmanmeri. Dispela ol maket ol I no nidim ausait lain long ronim wok bilong maket na ol pipol yet I painim rot bilong ol yet long salim ol samting long maket.

Taim planti I toktok long graun ol meri long ol ples I save gat gutpela sans long yusim graun bilong ol long groim kaikai bilong famili na bilong salim long maket. Long hia I gat luksave olsem ol meri I fri long mekim wok na long go long maket.

Long dispela ol maket planti taim em ol meri I save stap. Dispela em I isi long ol meri olsem ol I noken hatwok long go longwe long maket.

I gat luksave olsem ol insait long olgeta gaden long Papua Niugini I gat moa kaikai I stap. Long sait bilong rot em I isi tru long kisim ol fres kaikai long liklik moni. Dispela I save halivim ol fama long ol ples.

Long wanpela stadi Dr Tim Anderson I mekim insait long 4-pela provins em I luksave olsem ol lain I maket long sait bilong rot I save mekim planti moni. Dispela em I bikos ol I save maket long ol gutpela hap na ol save salim moa long wanpela samting.

Wanpela gutpela samting long ol dispela maket long sait bilong rot em olsem olgeta fama ya I no nidim narapela lain long halivim ol long gaden bilong ol. Ol I no nid tu long kisim lon long benk long groim ol kaikai bilong salim long maket. Gutpela tru em olsem olgeta fama ya I gat graun na ol I no nid long askim husat man o meri long yusim graun blong ol yet long groim kaikai. Wankain tu, ol meri long ol ples long Papua Niugini I no rabis olgeta. Ol tu I gat graun na ol I save amamas long planim kaikai long dispela graun na kisim I go long maket.

## 6. OLSEM WANEM LONG WELPAM?

Welpam em I makim nupela tingting bilong yusim graun. Bihainim strongpela sapot I kam long sampela gavman bilong ol arapela kantri na ol aid grup husat I save givim moni long gavman bilong Papua Niugini, nau gavman I sanap strong long sapotim wok bilong welpam insait long kantri.

Dispela wok bilong welpam I save wokbung gut tru wantaim loging o pasin bilong katim diwai na salim long kisim moni. Taim kampani I katim diwai na salim I go pinis em I save go bek na planim welpam antap long ol graun ya.

Long sampela hap long Papua Niugini maski gavman I ting welpam bai I bringim bikpela moni, ol pipol I gat tupela tingting olsem na ol I no wanbel long larim graun bilong ol I go bilong growim welpam. Long dispela as na ol welpam plantasin I no wok long kamap hariap inap sampela taim I go pinis nau.

Ol pipol I no laikim welpam bikos ol I luksave long ol giaman pasin blong ol kampani na tu I nogat gutpela moni I save kam long wok bilong welpam. Bihainim lata bilong wok welpam ol pipol I luksave olsem ol I stap long tambolo tru bikos kampani em I no bilong ol - em I bilong ol arapela lain long narapela kantri. Ol pipol I save ol bai I lusim traipela tuhat na pe bilong ol bai I aninit tru.

Sampela savemanmeri I bin skelim na ol I luksave tu olsem moni wanpela fama I

save kisim long wok bilong welpam em I save tambolo long moni em inap mekim long ol liklik maket long sait bilong rot.

Yes, sampela I tok olsem welpam em I save bringim planti moni long ol bikpela kampani tasol long ol lain long ples em I save bringim liklik moni tasol.

Skelim. Insait long ol bikpela welpam plantasin ol Mama Lus Frut I save mekim wok bilong kisim ol frut I pundaun long graun. Dispela progreem bilong Mama Lus Frut em I kamap bilong givim sans long ol meri tu long kisim fotnait insait long wok bilong welpam. Tasol ol dispela mama I no save kisim planti moni. I nogat evidens I stap we I soim ol meri insait long dispela progreem I amamas na sindaun bilong ol I kamap gutpela.

Welpam em I bikpela wok bilong wanwan famili na moni I no bikpela. Long yia 2006 Viles Wel Pam I bin mekim K61 tasol insait long wan wik.

Welpam tu I save bringim planti hevi long ol bus, graun na wara. Em I hat long stretim ol bagarap hariap o insait long sotpela taim. Dispela veliu bilong graun em planti pipol long arapela kantri I save les long toktok long en.

Pasin bilong salim ol kaikai long maket long sait bilong rot na ronim wanpela o tupela liklik bisnis em I no save givim planti hatwok na moni I save gutpela. Dispela wok I no save bringim planti hevi long bus, graun na wara. Em tu I no save pulim ol meri na pikinini I go longwe long mekim wok.

## SKELIM SAMPELA WELPAM WOK LONG ORO PROVINS

### **Ahora**

Aroha em I no save groim welpam. Em I lukautim wanpela Wail Laif Menesmen Eria. Em I tok dispela Wail Laif Menesmen Eria I bagarap nau bikos long welpam. Klostu long em Higaturu Welpam kampani I stap na I save sprayim marasin bilong kilim gras. Na tu long taim ren I kam em I save wasim ol marasin bilong rat I go insait long wara blong ol. Welpam em I bikpela wok na benefit em I liklik. Planti pipol I bin ting ol bai I kisim planti benefit tasol nogat. Bagarap I winim benefit.

### **Sorovi**

Sorovi em I gat liklik welpam plantesin aninit long VOP. Em I tok em I save hatwok long inapim ol nid bilong famili blong em. Em I hat tru long kisim sampela moni na ol I no save kisim halivim long kampani OPIC.

### **Kakandetta**

Ol pipol long dispela hap I tok graun em state I kisim pinis na mipela gat liklik graun tasol. I gat bagarap I kam long ol marasin kampani I yusim. Ol gaden blong mipela I stap arere long welpam plantesin na sais bilong ol kaikai I liklik na kaikai I no moa gutpela. Welpam kampani I kisim bikpela hap graun na long lukautim ol liklik welpam plantesin mipela mas baim ol marasin. Welpam em I bikpela wok na liklik moni blong em.

Mipela I no bin save olsem bagarap bai I kamap na wok bai I bikpela na mipela bai I nidim moni long lukautim gut ol welpam blong mipela. Nau mi les long welpam.

### **Gona**

Ol Gona I tok ol I save olsem senis bai I kamap tasol ol I hat long bilip olsem ol I wok long surik I go bek long baksait. Ol I putim planti taim I go insait long wok bilong welpam tasol ol I no kisim gut kaikai long tuhat blong ol. Nau ol I sot long graun, na ol I pait long dispela liklik graun I stap. Moni I no inap na I save pinis hariap tru, na kainkain sik I bungim ol. Wara blong ol tu I bagarap na ol I nogat gutpela klinpela wara. Dispela wara bipo I save klin. Ol Gona I ting welpam em I orait long liklik famili tasol em I no orait long bikpela famili.

### **Sosoba**

Long Soroba ol I tok, "welpam I bagarapim sindaun blong mipela. Kampani I no bin luksave long ol nid blong mipela. Ol I bin kisim graun blong mipela na ol I promis long givim mipela pawa lait tasol ol I no mekim. Ol I bagarapim graun blong mipela na mipela I kisim kainkain sik. Nau mipela belhevi tru na mipela laik rausim welpam kampani."

### **Aeka**

Aeka em I wanpela smolholda welpam fama long Oro Provins. Em I tok, "planti taim kontrakta bilong kisim ol welpam



frut I no save kam na ol frut I save sting na I nogat moa yus long kampani. Mipela I bin rausim ol kakao bilong mipela na growim welpam bikos mipela I no bin kisim sapot long wok kakao. Wok bilong welpam em I bikpela wok na I no olsem buai na pinat. Mipela I save givim planti taim long wok welpam na liklik taim tasol long wok gaden. Nau yet I gat planti welpam plantesin I sanap nating bikos wok em I hat tumas. Mipela i tingting long go bek na planim kakao.

-----

Ol stori bilong ol wantok long Oro Provins I tokim yumi klia wanem kain ol hevi I save kamap taim welpam I kam insait long ples. Em I klia taim welpam kampani I save toktok long viles welpam em I no save tok klia olsem welpam em I traipela wok na sapos ol famili I gat inap wokmanmeri orait ol I ken tingting long planim welpam. Planti taim bilong famili bai I lus long wok bilong welpam na bai I nogat taim long growim kaikai bilong ol long lukautim ol yet. Kampani I no save

tok klia tu olsem long halivim wok bilong welpam ol fama ya bai I nidim planti marasin we ol I mas baim long stua tasol.

Welpam I luk olsem wanpela nambawan keskrop we inap bringim planti moni tasol em I no inap apim na givim gutpela sindaun long ol pipel. Em I ken bringim sampela moni long ol famili tasol em I save rausim gutpela pasin na gutpela sindaun. Ol pipol insait long wok welpam I save traim hat tru long mekim moni olgeta taim na I gat liklik taim tasol long givim spes long ol yet long kamapim gutpela sindaun.

Sapos yumi skelim gut, moni I kam long welpam em I aninit long ol arapela keskrop. Pe bilong bagarap I kamap long bus, graun na wara em I save bikpela tru, na dispela pasin bilong growim wanpela kain keskrop tasol olsem welpam I no inap givim spes long ol fama long growim narapela keskrop o narapela liklik bisnis long halivim ol long mekim sampela moa moni.



## 7. KOPORESEN LONG PLES

Yumi stori pinis long haibrid sistem. Nau yumi laik lukim sampela kain rot bilong wok bung long surikim wok bilong ol famili antap long graun I go long sampela gutpela mak.

I gat sampela nupela tingting I wok long kamap nau insait long Papua Niugini. Sampela wok I stap pinis long soim olsem I gat spes bilong ol pipol yet long bihainim ol narapela rot long mekim wok antap long graun bilong ol yet na ol inap lukim sampela gutpela moni I kam long wok bilong ol. Daunbilo hia em sampela eksampel bilong ol wok ya.

Bikpela tingting insait long dispela ol stori em olsem ol pipol ya I luksave graun em I stap long han bilong ol na ol yet I gat pawa long senisim dispela tingting olsem gutpela senis bai I kam sapos ol I givim graun bilong ol I go long bikpela kampani. Dispela ol stori I sanap strong long tingting olsem ol inap long stap insait o go pas long nupela tingting bilong kamapim gutpela senis long sindaun bilong ol, ol yet.

### **Sausi Viles Koperesen Madang**

Dispela em I wanpela grup long Madang Provins. Ol I tok strong olsem ol I no laikim tru welpam na ol I no sindaun tasol. Nogat. Ol I tanim na lukluk long ol samting we ol yet inap mekim. Ol I kisim wok bilong rais, pis, kakao, melen na kamapim liklik trasfan bilong salim ol pikinini blong ol long I go long skul. Ol I tilim gut tru ol wok namel long ol yet na ol I no lukluk bek. Inap nau ol I

wok strong yet na dispela rot I halivim ol gut tru na ol I was gut nogut welpam kampani I kam grisim ol.

### **Goroka Agri-Business Trening Skul**

Dispela skul em I stap arere tasol long Goroka taun. Em I save givim skul long pasin bilong lukautim gut fam, pasin bilong groim na kisim kaikai insait long wanpela yia na pasin bilong salim kaikai na kumu long holsel maket. Long tok Inglis ol I tok, agrikalsa ekonomiks.

Dispela tingting em I wok gut tru na nau yumi lukim planti kaukau na kumu I kam long hailans na I pulapim ol maket long Mosbi, Lae, Madang na ol arapela maket long Papua Niugini. Ol fama long hia I kamap masta bilong wanpela kain gaden kaikai na ol I lainim gut tru pasin bilong growim na lukautim dispela ol kaikai, olsem na ol inap mekim planti moni long wanpela o tupela gaden kaikai.

### **Maket Meri Koporetiv long Morobe, Is Niu Briten na Isten Hailans**

Long Papua Niugini olgeta yumi save lukim ol meri I save pulapim ol maket wantaim planti fres kaikai. Bipotaim ol meri I save go wanwan long maket. Nau dispela taim planti meri I kamapim pasin bilong wokbung long karim ol gaden kaikai I go long maket. Ol I save wokbung na hairim kar na ol I save pasim tok long ol prais bilong ol kaikai ol inap salim long en. Planti meri grup tu I save bung na baim kar bilong ol yet na ol I save hairim

ol man draiva long draivim kar bilong ol kisis ol i go long maket. Nau dispela taim ol I surik I go moa yet na ol I lukluk nau long salim sampela samting olsem flawa na kopi I go ovasis.

### **Madang Maror**

Madang Maror em I wanpela netwok bilong ol pipol long ol ples long Madang we ol I serim infomesen long pasin bilong kamapim na holim gutpela sindaun. Ol I luksave long gutpela sindaun we I kam long graun bilong ol, na ol I go bek na mekim moa wok long lainim ol yangpela bilong ol long holimpas ol gutpela pasin bilong ol.



## 8. BANISIM GRAUN

I gat tingting olsem ol graun long ol rurol ples I nogat bikpela veliu blong ol. Ol I save silip nating tasol I stap. Kain tingting I halivim long bringim ol arapela lain long go insait long ol ples na kisim graun na mekim wok antap long en. Tasol sapos yumi skelim gut dispela ol tingting bai yumi lukim olsem ol graun I no save silip nating. Nogat tru. Ol I save wok olgeta taim na ol gat bikpela moa veliu. Daunbilo em sampela skelim tingting we ol savemanmeri I bin putim ples klia;

Long Oro Provins sapos wanpela famili I lisim graun blong em long wanpela yia. Insait long dispela wanpela yia em inap kisim K100 long wanpela hekta long rent na royalty tasol. Em sapos em I lisim graun tasol.

Tasol sapos dispela famili I laik planim sampela welpam tu long graun bilong ol yet olsem sampela famili mekim long Wes Niu Briten na Oro Provins, ol inap kisim K2,553.00.

I go moa yet sapos dispela ol famili I planim planti moa welpam long seim graun ol inap kisim K8,884.00.

Sapos ol famili I krangki na salim graun bilong ol, ol bai I lusim I go gutpela sindaun bilong ol we graun I save givim. Long Papua Niugini graun em I no samting we yumi inap toktok long salim long moni o long senisim long wanpela narapela samting.

Lukluk I go moa yet insait long ol ples bilong yumi long Papua Niugini wanwan

famili I save yusim klostu K19,500 moni long wanwan yia. Dispela ol moni ol famili I save kisim taim ol I salim ol keskrop olsem; buai, kakao, kopi, kopra na ol gaden kaikai.

Sapos wanpela bikpela welpam kampani I kam planim planti welpam long traipela hap graun bilong wanpela ples em inap mekim samting olsem K24,671.00. Dispela em I no traipela moni tru olsem planti yumi I ting. Sapos yumi skelim na brukbrukim dispela ol moni I go long olgeta wok bilong welpam bai yumi lukim olsem liklik moni tasol bai I lef.

I moabeta ol pipol yet I mas holim na bosim graun bilong ol yet na bihainim haibrid sistem bilong groim ol gaden kaikai na mekim ol liklik wok bisnis wantaim na salim long maket na kamapim moni. I nogat wanpela ol bikpela wok antap long graun olsem ol plantesin I save bringim planti moni I go bek long ol papamama graun.

Dispela tingting bilong rentim graun insait long ol ples em I wanpela longlong tingting tru. Namba wan samting em olsem; long rentim graun insait long ol rurol ples em bai I no inap tru long soim olsem graun I gat veliu o nogat. Em bai I soim tasol olsem ol pipol I nogat rispek tru long graun. Nambatu em olsem, insait long olgeta wok bilong kisim graun I nogat sans tru long sampela gutpela senis bai I kamap. Las em olsem planti graun long ol rurol ples we I go aut

aninit long lis o rent I save min olsem ol pipol bai I lusim graun bilong ol olgeta. Dispela em long wanem divelopa bai I tok graun I silip nating na em I kam na mekim wok antap long en. Em nau em I tok I putim veliu I go antap long graun ya. I gat ol eksampel tu long Papua Niugini olsem taim kampani I pinis wantaim lis bilong em, em I save no laik long givim bek graun long ol pipol. Em I save kirap na salim graun ya gen long narapela kampani na dispela I save kamapim planti hevi wantaim ol papamama graun.

Tupela bikpela hap tok long tok Inglis I olsem 'Reconciliation' na 'Resistance'. Reconciliation em olsem papagraun o mamagraun I orait long ol bagarap I kamap long graun bilong em. Em I min papagraun o mamagraun I givim tok orait long kampani I ken mekim wok antap long graun bilong em na famili o klen. Em I orait, tasol glasim gut yumi ken luksave olsem isi isi kampani I wok long kisim graun tasol ol papamama graun I no save luksave.

Resistance em I min olsem ol papamama graun I no wet long harim ol gris toktok bilong kampani. Nogat. Ol I luksave pinis long tingting bilong kampani o gavman na ol I tok nogat tasol long lusim graun bilong ol I go.

Olsem wanpela sif long Vanuatu I tok, "Em I no stret tru long toktok long graun olsem wanpela samting bilong salim long maket. Dispela long wanem graun em I wok long planti tausen yia I kam pinis, na bungim wantaim wok em I mekim long envairomen na kontribusen bilong em long pasin na kalsa bilong yumi, em bai I hat tru long yumi putim moni mak antap long graun."

Olsem yumi stori pinis long narapela sapta gavman bilong Papua Niugini I wanbel long ol welpam prosek long go het. Bilong mekim dispela I kamap ol I mas kisim moa graun. Aninit long Spesel Agrikalsa na Bisnis Lis (SPABL) polisi gavman I givim tok orait long ol ovasis kampani long kam na planim welpam.

Tasol bikpela asua I bin kamap. Aninit long dispela SPABL progrem moa long 5.2 milien hekta bilong graun I bin lus nating long han bilong ol pipol na kampani I go planim welpam. Ol pipol I bin kalap nogut long dispela pasin na hariap tru gavman yet I bin salim ol wokmanmeri bilong em long mekim wok painimaut long dispela hevi. Tasol inap nau ol graun ya I lok yet I stap long han bilong ol kampani na ol pipol I no amamas na gavman I no mekim wanpela samting long en.

Ol papamama graun nau I stap long planti salens. Ol bai I mekim wanem? Salim graun o noken salim graun? Na sapos ol I no salim nogut ol I kalap nogut graun bilong ol I stap pinis long han bilong ol arapela lain.

## TAIM GRAUN I GO AUT PINIS

Taim graun I lusim han bilong yu pinis bai yu mekim wanem? Planti pipol long ol rurol ples I no klia olsem na ol I save amamas tasol long wanpela K100 o sampela bia o raisbek o wanpela lenkrusa. Sampela taim dispela ol lain I save sori gen taim ol I luksave olsem kampani I bin trikim ol.

Tasol sampela papamama graun I save na ol I no save wanbel long graun bilong ol

I go long han bilong kampani na gavman na ol I yusim sampela rot long toksave long tingting bilong ol. Dispela ol papamama graun I bin yusim ol kainkain rot long tokaut long belhevi bilong ol.

### **Rot bilong kot**

Sampela yia I go pinis tupela Non-government organisation (NGO) I bin kamap long halivim ol papamama graun long kotim ol lain I stilim o pulim nating graun bilong ol. Tupela NGO grup ya em Environment Law Centre (ELC) na Centre for Environmental Law and Community Rights (CELCOR). ELC I no moa stap. CELCOR em I stap long Mosbi.

Dispela rot em I gutpela tasol em I dia tru na I save kisim longpela taim.

Sampela taim insait long sistem bilong kot, sampela paul pasin I ken kamap na ol papagraun I save senisim tingting bilong ol.

Tasol dispela em I wanpela rot we I gutpela tru long bihainim long wanem lo I ken sekim gut na sasim husat ol lain I mekim wok bilong stilim graun long ol pipol.

### **Wok wantaim ol pipol long ples**

Dispela rot I no nidim planti moni. Em I save wok gut tru long wanem taim olgeta pipol I bung na kirap na muv long mekim wanpela samting bikpela senis I save kamap. Em I gutpela tru tu long wanem olgeta pipol I gat graun I save long mining bilong holim graun, na ol I pilim wankain pen taim ol I harim graun bilong narapela brata o susa I lus pinis I go long han bilong ol birua. Em I gutpela bikos

em I soim strong bilong komyuniti.

Wanpela grup we I mekim gut dispela kain kikkbek pasin taim welpam kampani I kam long graun bilong em Sausi Komuniti insait long Madang Provins. Ol I tok nogat long welpam na ol I soim olsem ol I gat save long yusim graun bilong ol yet taim ol I go het na planim rais, kakao, pinat, melen na ol arapela samting na mekim moni long ol.

### **Menesmen Trening**

Ol saveman na ol lain I save pulim graun I luksave pinis olsem ol pipol bilong Papua Niugini I save long sosel veliu bilong graun tasol ol I sot tru long tingting bilong graun olsem wanpela moni sistem. Ol I save graun yet em I wanpela sistem tasol nau ol I bam liklik long tingim olsem graun I mas kamap olsem wanpela moni sistem. Menesement trening em I bilong halivim ol famili na klen long lukautim na bosim gut graun bilong ol na abrusim ol salens we I wok long kam long ol. Dispela ol trening em I gutpela tru long wanem ol I soim ol famili sapos ol I planim samting antap long wanpela hap graun, ol inap mekim sampela kain moni mak. Em I min olsem ol famili I nogat nid long yusim traipela hap graun tru long mekim moni.

## 9. KAIKAI I NO SAVE SOT

Yumi save ol ples we I nogat hangre I save amamas na gutpela sindaun I save stap. Yumi save tu olsem ol ples we graun I stap fri na I we ol pipol I save was gut long graun ol I save inap tru long kaikai.

Long ol ples we kaikai I no save sot em I trupla promis bilong ol pipol husat I nogat wari tru long sindaun bilong ol bikos gutpela sindaun I save stap oltaim. Pipol bilong Papua Niugini I gat pasin bilong serim kaikai na dispela em I winim tru kalsa bilong moni.

Planti taim ol fama I save serim ol kaikai ol I growim long gaden bilong ol. I no olgeta taim ol I save salim olgeta kaikai long kisim moni. Nogat. Pasin bilong lukautim wanpela na narapela em I bikpela tru. Dispela kain pasin I mekim na I no save I gat bikpela hangre long ples bilong yumi.

Insait long Pasifik ol tingting bilong growim na saplaim planti kaikai long ol pipol I save abrus long sampela ting. Tingting bilong tupela bikpela kantri insait long Pasifik; em Austrelia na Niu Silan em olsem olgeta kaikai I mas kam long ol traipela fam we ol bikpela kampani I lukautim na bosim. Tasol lukluk gut insait planti kantri long Pasifik ol pipol I save growim ol kaikai bilong ol yet olsem na bilong wanem na ol bai I nidim bikpela kampani long growim kaikai bilong ol?

Taim kampani I bosim bikpela fam, planti pipol long ol arapela kantri I save ting

olsem em I orait bikos em I groim kaikai bilong lukautim olgeta. Tasol planti tingting I save abrus tru long dispela pasin bilong growim kaikai. Namba wan samting ol I save abrus long en em olsem; ol pipol inap long growim kaikai bilong ol yet, em I samting ol I mekim planti tausen yia pinis na bilong wanem tru bai ol bikpela kampani I laik senisim dispela pasin? Ol I abrus tru long luksave tu olsem dispela graun tasol I save givim wok long olgeta pipol na ol I mekim inap long strong na skel bilong wanwan.

Ol bikpela fam I save growim wanpela kain kaikai tasol na sapos yumi skelim pasin bilong kaikai ol pipol I save bungim tupela o moa kaikai long kamapim wanpela plet kaikai bilong famili. Long pasin bilong lukautim bodi, ol pipol I mas kaikai moa long wanpela kain kaikai olsem na yumi ken lukim insait long ol liklik gaden bilong yumi - olgeta kain kaikai I stap. I no wanpela kain tasol olsem ol bikpela kampani fam.

Astingting bilong ol bikpela kampani fam em I no bilong lukautim ol pipol. Em I klia ol I laik kisim graun tasol na mekim moni antap long en. Olsem wanem tru bai ol I yusim liklik lain pipol tasol long growim kaikai na bihain salim bek long yumi long baim long moni? Dispela tingting bilong growim kaikai long bikpela fam em I krangki tru.

Tingim. Long yia 2008 taim bikpela hevi bilong sot long kaikai I bin kisim sampela

kantri long wold ol pipol long Papua Niugini I no bin pilim dispela hevi. Em bikos bikpela populesen bilong Papua Niugini I stap long ol rurol ples na ol I save kisim olgeta kaikai bilong ol long ol graun bilong ol.

Tingting bilong kisim graun long growim kaikai I no bikpela yet long Papua Niugini tasol em I gutpela long was nogut dispela sistem I kam bagarapim gutpela sistem bilong yumi long lukautim yumi olgeta na nogat hangre I ken painim yumi.

Bikpela toktok bilong kaikai yumi ken lukim long rais. Papua Niugini I no save growim rais bilong em yet. Nogat. Olgeta yia em I save baim planti rais tru long Austrelia. Austrelia I save givim planti moni long Papua Niugini aninit long aid progrem bilong em, tasol em I nogat laik tru long halivim Papua Niugini long growim rais bilong em yet.

Skelim tu. Taim yumi hangamap long rais na ol arapela kaikai I kam long ol arapela kantri yumi no inap long kontrolim prais bilong ol kaikai ya. Tingim. Long ol liklik maket ol fama yet I save kontrolim prais. Long bikpela kampani maket bilong kaikai ol pipol I nogat kontol long prais. Nogat. Ol I mas baim kaikai long wanem prais kampani I makim.

Skelim. Taim, taim nogut I kam na ol rais fama ovasis I no inap growim rais moa, ol pipol husat I hangamap long rais I save kisim bikpela bagarap. Dispela I min olsem bai I gat liklik rais tasol long maket olsem na prais I mas sut i go antap olgeta.

Lukluk I go moa yet, yumi Papua Niugini I no stap insait yet long maket bilong salim gaden kaikai. Planti arapela kantri ol I stap pinis na yumi ken lukim Austrelia em I laik go pas na bosim maket bilong ol 'grein' olsem rais. Yumi harim sampela stori bilong Pasifik olsem long Tonga na Fiji ol I save salim taro,

Fiji I salim tu kawawar na Vanuatu I save salim koniak. Em I no gutpela tru taim Papua Niugini I gat moa long 85 pesen populesen bilong em I wok long ol liklik fam o gaden na growim kaikai, tasol I nogat planti toktok long subim sampela dispela ol kaikai I go long intanesenel maket bilong kaikai.

Tasol olsem wanem insait long domestik maket long Papua Niugini I gat planti nid tu long ol fres kaikai.

### **Rausim pipol long graun na hangre**

I gat planti stori pinis na luksave tu olsem taim ol pipol I nogat moa graun bikpela hangre I save kisim ol na sindaun bilong ol I save bagarap tru. Dispela em I wanpela bikpela hevi insait long pasin bilong kisim graun long ol pipol.

Ol pipol husat I hangamap tru long graun long kisim gutpela sindaun I no inap tru long senis hariap ovanait na stap gut insait long sistem bilong moni. Nogat tru. Ol I mas kisim sampela taim long lainim pasin bilong moni. Sapos ol I no lainim dispela pasin hariap, veliu bilong laip bilong ol bai I bagarap olgeta.

Lukluk raun long ol ples arere long ol bikpela welpam plantesen em I no hat long luksave long hau ol famili I save taitim bun long painim moni na kaikai bilong wanpela de tasol, na tomoro ol I save go mekim wankain ken. Dispela fridom we ol I bin I gat taim ol I gat graun I no moa stap. Dispela sekyuriti we ol I bin gat, na I no wari long painim kaikai long wanwan de bai I lusim ol olgeta.

Long planti hap long wold na sampela hap long Papua Niugini taim graun I lusim han bilong ol pipol na I go planti I save go mekim gaden long graun bilong narapela

klen. Dispela I save kamapim planti hevi namel long ol brata na susa na pait I save kamap. Planti arapela hevi tu I save kamap taim ol pipol I nogat graun moa.

Taim ol pipol I go mekim gaden olsem long graun bilong narapela klen em soim tru olsem ol I soim ol I hangamap yet long graun. Ol I no redi yet long larim graun I go. Graun em I promis bilong gutpela sindaun.

### **Kisim Gut Kaikai**

Planti bikpela kantri I save tok ol pipol long Pasifik I no save kaikai gut. Long tingting bilong ol, ol kaikai bilong ol pipol long Pasifik I no gutpela. Seim taim ol I bihainim lo bilong nutrisen we I tok olgeta pipol; man, meri na pikinini I mas kisim 3-pela kain kaikai olgeta de. Dispela 3-pela kain kaikai em ol stas, ol kumu na frut na sampela kain abus.

Skelim. Hau ol pipol I kaikai em I no hevi bilong graun. Graun I givim kaikai. Pasin bilong kaikai rait kain kaikai I stap long wanwan man, meri na pikinini. Sapos ol I sot long save bilong kisim kaikai stret orait em I min sampela skul I mas go long ol pipol.

Taim ol pipol I baim kaikai long stua long liklik moni ol I save pilim olsem laip em I isi tru. Tasol planti taim ol I no luksave olsem ol kaikai ya I no save helpim gut bodi bilong ol long stap helti. Long ol rurol ples we ol fama I save wok gaden fultaim, ol I save kamap les na slek long groim moa kaikai.

Skelim ol liklik gaden long ol rurol ples I save gat olgeta kain kaikai I stap long en. Ol bikpela kampani fam I save groim

wanpela kain kaikai tasol. Yumi ken askim hau stret dispela bai inapim olgeta 3-pela kain kaikai nid bilong ol pipol? Dispela I min olsem ol I mas painim moa graun long groim ol arapela kaikai.

Sapos yumi skelim nau long ol taun na siti, ol gutpela fres kaikai I save dia tru. Prais bilong ol I save antap tru na ol liklik pipol I no save inap long baim. Insait long Papua Niugini planti I hangamap long rais na tinpis na I save sakim ol frut na kumu I go long sait. Nudels em I kamap olsem kumu nau.

Dispela pasin bilong kaikai I no helpim bodi bilong yumi tasol em I mekim ol rais growa na sela I amamas tru long wanem ol I wok long mekim planti moni long dispela.

Taim ol pipol I hangamap long kaikai bilong stua, ol bai I lus tingting long graun bilong ol. Ol I save les long wok gaden na ol I no save wari moa long liklik fotnait moni ol I save kisim. Long dispela kain pasin na planti famili I no save kaikai gut na ol I save hangre.

Tasol insait long ol ples we fres kaikai I pulap tru, ol I no save hangre.

Graun I no mekim na ol pipol I kaikai krangki. Tingting bilong moni I paulim ol na ol I mas baim ol sip kaikai long liklik moni. Em nau bodi bilong ol I save gro longlong



## 10. TINGTING GUT GEN

Papua Niugini em I wanpela kantri insait long wold we graun em I stap yet long han bilong ol pipol. Dispela I bin mekim na inap planti yia nau ol pipol bilong Papua Niugini I no bin bungim planti hevi olsem bikpela hangre, pasin bilong ausait long komyuniti, olsem ol sampela arapela kantri I save bungim. Ol pipol long Papua Niugini I bin I gat kontrol long graun bilong ol long longpela taim tru.

Tasol nau ol papamama graun I bungim bikpela salens. Ol I gat ol pikinini I go long skul na ol I nidim moni long baim skul fi na ol I nidim moni long baim hausik fi o klos na ol bilas bilong ol pikinini. Ol I save ol I stap nau long taim bilong moni. Nau planti papamama graun I save brukim dispela strongpela banis long graun bilong ol na ol I larim ol investa I kam insait na mekim wok antap long graun bilong ol.

Ol ausait lain husat I putim moni long sapotim wok bilong rausim graun long han bilong ol pipol I laikim na pusim yet dispela tingting olsem graun em I mas stap long han bilong wanwan man o meri na I no long kontrol bilong klen.

Ol stori I stap pinis insait long dispela buk ya I putim long ples klia sampela tingting we ol pipol yet inap bihainim bilong mekim wok antap long graun bilong ol. Ol dispela tingting I sapotim ol pipol long sanap strong na holim graun bilong ol.

Planti savemanmeri I laikim ol pipol I mas givim graun I go na ol I ken mekim kamap ol traipela fam. Ol I tok ol pipol long Papua Niugini I pas yet long pasin tumbuna na I no inap mekim graun I wok. Dispela buk I tok ol pipol I ken surikim wok gaden bilong ol na mekim sampela arapela wok tu seim taim long mekim sampela moa moni antap long gaden kaikai.

Wankain taim insait long dispela buk, I gat gutpela luksave long gutpela kontribusen bilong ol liklik maket long sait bilong rot na ol haiwe long helpim sindaun bilong ol pipol. I gat luksave tu olsem ol I gat moa meri I save mekim wok maket long sait bilong rot na ol liklik maket na ol yet I save kontrolim ol prais bilong ol samting. Dispela em I gutpela long wanem I nogat planti presa long ol meri long go longwe long salim ol gaden kaikai long maket.

Dispela ol tingting I sapotim tingting olsem graun em I gat wanpela ekonomik sistem bilong em yet, na em I no wanpela gridi sistem. Em I skelim gut olgeta samting na I save inapim olgeta pipol bilong em. Em I no samting we ol pipol inap brukbrukim haphap na salim. Nogat. Graun em I poro tru bilong ol pipol na moni I wok long paulim ai bilong planti nau long dispela taim.

Long planti arapela ples we ol pipol I nogat graun moa, sindaun bilong ol I save bagarap tru. Ol I save hatwok tru

long painim kaikai, na gutpela wara na ol samting bilong mekim haus na ol I save hatwok tru long painim moni tu. Tingim. Antap long graun maski yumi wok moni long opis, graun I save givim yumi kaikai yet. Tasol graun em I stap long bikpela birua nau. Ol monimanmeri I wok long bisi tru long pulim graun long ol pipol na I no save kia long wanpela samting. Ol

I no wari sapos ol I bagarapim sindaun bilong ol arapela pipol. Ol I laikim graun tasol long mekim moni antap long en.

Tingim graun em I no samting nating. Em I gat laip na taim yumi no rispektim em na rausim em I go yumi save bagarapim yumi yet. Tingim! Graun I no nidim yumi. Yumi pipol I nidim em.







Graun I wok long kamap sot nau long planti hap long wold.  
Planti yumi long ol ples I wok long pilim presa nau taim wok  
dvelopmen I laik kam long ples bilong yumi.

Dispela buk I tok strong olsem pasin bilong mekim mani na kamapim  
dvelopmen I nogat mining sapos ol lida I no luksave long gutpela  
sindaun graun I save bringim long ol pipol. Em I tok olsem dispela  
tingting olsem ol bikpela wok agrikalsa we I save planim wanpela kain  
keskrop tasol I save bringim planti mani na ol liklik gaden long ol ples  
I no save mekim mani em I no stret. Insait long wok painimaut bilong  
raitim dispela buk I gat luksave olsem ol liklik fama long ol ples I save  
mekim moa mani winim ol lain I wok long ol plantesin.

Dispela buk I tok strong olsem ol pipol bilong Papua Niugini I mas  
holim strong graun bilong ol na mekim wok antap long dispela graun.  
Ol fama I mekim pinis na ol I mas gohet yet long mekim wok bihainim  
wanpela haibrid sistem we ol I ken mekim tupela o tripela kain liklik  
wok bisnis long bringim moa mani I kam long ol yet.

**AID WATCH**  
Action on Aid, Trade and Debt

 **THE  
CHRISTENSEN  
FUND**

